

N° 2017/E1/003

**DUMANDA ORALE POSTA da Mma Mattea CASALTA  
À NOME DI U GRUPPU « FEMU A CORSICA »**

**OGETTU : CUMERCIU IN DIFICULTÀ IN I CENTRUCITÀ.**

Sta dumanda hè indirizzata à voi, O Sgiò Presidente di l'Agencia di Sviluppo Economicu di a Corsica.

S'è no femu u ritratu di u sviluppu economicu di a nostra isula, ci pudemu accorghje subitu subitu chì l'attività si tramuta da u centru di e cità ver'di i so cuntorni.

U più di e cità europee si opponenu à issu schema, ma in Francia assai spessu a regula ùn hè quessa è ferma u movimentu di fughjita in periferia

Hè cusì in Corsica, in Aiacciu hè cusì!

U centrucità d'Aiacciu si viota, i cumerci chì ci sò chjodenu unu à pressu à l'altu à prò d'una zona periurbana industriale neocumerciale. A so urbanizzazione anarchica, senza capunanzu una riflessione glubale, senza pianu reale di circolazione è quessa ci ramenta l'esempi pessimi di a Francia cuntinentale.

I cumercianti d'Aiacciu anu a ragiò di lagnà si ch'ellu calessi propiu u so sciffru d'affari. Hè vera chì a cunsumazione di a clientela hè differente (internet, distribuzione maiò...), ma ciò chì ferma un trampulu maiò hè l'impossibilità di ficcà si in centrucità, qual'ella sia l'ora di a ghjurnata.

Hè un saccu viotu ch'elli provanu à salvà unepochi d'affidati à a so attività. Hè tamantu u malesse è l'avemu intesa è custatata ind'è parecchje riunione

Issi picculi cumercianti anu u sintimu di esse i pacarelli « lacati da cantu » di un sistema chì schjaccia è pare ch'elle ùn bastinu e poche misure chì li sò pruposte da accuncià l'affare.

Ma sarà quessa, o Sgiò Presidente, u schema di sviluppu ch'ella vole pè a Corsica a nostra magiurità?

Sangue di e petre bella sicura ùn ne pudete caccià, è a nostra cullettività tutte e cumpetenze ùn l'hà, ma tandu, chì urientazione ci puderianu esse, à parè vostru, da migliurà issa situazione ?

À ringrazià vi.

